



DSWD Core Shelter Assistance Project

Vol. 4 No. 10

Hunyo 16-30, 2014 P6.00

34 ka pamilya mahatagan og balay

Itugyan na ngadto sa mga benepisyaryo ang pabalay didto sa Palayuhan, Siit karong Hulyo 2, 2014. Sila ang mga biktima sa bagyong Sendong niadtong Disyembre 2011.

Adunay 34 ka pamilya ang makadawat sa pabalay nga lumulupyo gikan sa Siit, Bonbonon, Napacao, Malabuhan, Tayak, ug uban nga taga Bonawon ug Mantuyop.

Si Mrs. Panfila, Elumir, pangulo sa DSWD, nag-

ingon nga ang DSWD Core Shelter Assistance Project (CSAP) giaprobahan sa SB niadtong Mayo 20, 2012. Apan wala dayon kini malihok tungod kay daghan pang giagian sama sa pag-audit sa COA. Ang yuta nga gibalayan gihatag ni Mrs. Alona Ator, may sukod nga 500 metro kwadrado, ug balor P13,090,000.00. Tawgon kini og Palayuhan Village. Lakip na ang gitukod pa nga mga balay didto sa Itik, San Jose.

NegOr way ordinansa.

Ang mga makaangkun sa balay sa Palayuhan, Siit, Siaton mao sila si: Alberto Casion, Tayak; Clemente Torres, Napacao; Patrocino Lamare, Neil Trono, Abondio Lamare, Agustin Palopalo, Epifanio Jandog,

Romeo Kitane, Ernesto Jandog, Amelia Palopalo, Jane Trono, Ester Torres, Celerina Verbosidad, Feliciano Jandog, Myrna Jupiter, Estrella Jandog, Rogelio Delgado, Melindo Sarming, Joan Lajot, Arthur
padayon sa p. 4



Gihatagan ni Mayor Alberto Ator si Col. Lt. Miguel Ceballos sa 20th IB og sertipiko isip dinapit nga mamumulog sa Adlaw sa Kagawasan, Hunyo 12. Si Col. Ceballos nga taga Ilo-ilo mipasidaan nga ilalum sa iyang pagdumala makatagamtam ug kahapsay ang Siaton. Kasamtangang ania sa Siaton ang 20th IB nga gikan sa Samar isip puli sa 79th IB nga nagbansaybansay sa Fort Magsaysay. Adunay kapin sa 400 ka mga sundalo sa 20th IB dinhi karon.

20th IB motunol og serbisyo sa Siaton

Mga 400 ka mga sundalo nga gikan sa probinsya sa Samar kasamtangan nga maghatag og serbisyo dinhi sa lungsod sa Siaton. Si CPL. Jonas C. Ballesteros, 20th

IB Battallion Public Affairs (NCO) nagkanayon nga tulo ka bulan sila sa Siaton samtang ang ubang sundalo sa 79th IB gibansay sa "Battallion
padayon sa p. 3

NegOr walay ordinansa/ balaud batok pagdakop sa iho

Ang Municipal Agriculture Office (MAO) o buhatan sa agrikultura sa lungsod sa Siaton miangkun nga wala pa sila makaseguro kon asa gayod nga barangay naggikan ang karne sa iho nga nasakmit sa mga otoridad didto sa Cebu. Walay usay ordinansa o balaud ang Negros Oriental nga magdili sa pagdakop sa iho sa lalawigan.

Kini ang pamahayag nga gipagula sa MAO subay sa bag-ohay lang nga insidente didto sa Cebu diin usa ka trak nga puno og karne sa iho ang

nadapkan niadtong Hunyo 12, 2014. Matud sa tahu nga napatik sa *Cebu Daily News* ang maong mga karne sa iho naggikan sa Siaton.

Hinoo ang MAO aduna pagduda nga ang mga karne sa iho nakalusot dinhi sa Negros Oriental pinaagi sa pag-apil niini sa mga barla o skandal nga isda kay kini lamang ang adunay permiso.

Ang Isuzu Elf nga sakyanan adunay karga nga 467 ka kilo nga karne sa iho. Uban usab ang 170 ka *plastic*
padayon sa p. 3

EDITORIAL

Palayuhan Village

Sa katapusan maangkun na gayud sa 34 ka mga pamilya ang ilang bag-ong mga pinuy-anan sunod bulan. Kini human gitakda ang pormal nga turnover sa maong mga balay ngadto kanila nga nahimong mga biktima sa Bagyong Sendong niadtong tuig 2011.

Mikabat sa tulo ka tuig ang paghulat sa mga biktima. Apan nipasabot ang DSWD kinsa mao ang implementing agency kun ahensya nga mipatuman sa maong proyekto nga ang DSWD *Core Shelter Assistance Project* (CSAP) duha ka tuig gayud ang implementasyon niini sugod sa pag-aprobar sa Sanguniang Bayan niadtong Mayo, 2012. Dili dayon kini malihok tungod kay daghan pang implementasyon ug proseso sama sa pag-audit sa COA.

Ang mga pamilya nga makadawat sa pabalay lumulupyo sa Siit, Bonbonon, Napacao, Malabuhan, Tayak, ug uban nga taga Bonawon ug Mantuyop.

Ang yuta nga gibalayan gi-donar ni Alona Ator nga taga-Siaton nga dunay sukod nga 500 metros kwadrado og nagkantidad ang pabalay og P13,090,000.

Tawgon kini nga Palayuhan Village ug ilakip niini ang didto sa Itik, San Jose nga padayon pa ang konstruksyon.

Nindot nga palandungon nga makatulog na intawon og hinanok ang maong mga pamilya sulod sa ilang mga bag-ong pinuy-anan.

Apan unsa man ang responsibilidad niining maong mga pamilya agig bugti sa hinabang nga gitunol sa gobyerno alang kanila?

Sama sa mga *housing projects* sa nagkalainlaing mga lungsod og dakbayan, kinahanglan nga i-organisar ang komunidad niini. Ang matag usa adunay responsibilidad aron mas lunsay, hapsay ug malinawon ang maong komunidad.

Uban sa pagtambayayong sa mga residente sa Palayuhan Village maangkun gayud ang gidamgo nga luwas nga pagpuyo.



Bukhad

Susan Monte de Ramos-Soldwisch

“Mga Higala sa Public Library”

Ang *library* makatabang sa mga estudyante pinaagi sa mga *textbooks*, *reference books*, kompyuter, ug mga librong mahulaman.

Ang *library* sa lungsod anaay mga DVD, CD, ug *cassette* nga mahulaman usab. Makadugang kini sa kaalam ug makalingaw usab.

Sa sulod sa library, anaay lugar alang sa mga basahon sama sa nagkalain-lain nga magasin ug mantalaan. Dinhi makalulinghayaw kita. Anaa usay lugar sa *library* alang sa mga bata diin makabasa sila og libro. Mahimo usab sila nga motan-aw sa TV og DVD.

Sa ngadto-ngadto, matabangan usab ang mga kabarangayan aron sila makatukod og ilang kaugalingong *library*.

Nagtuo ako nga daghan kanato ang mosuporta sa “Siaton Public Library” isip mga boluntaryo sa pagpangita og donasyon, pagtabang ug pagsirbe sa publiko nga mogamit niini, ug pagpangita og pondo. Nagtuo usab ako nga mahimo kini natong mga ordinaryong lungsuranon. Sama sa pagpadalagan sa atong mga buluhaton sa simbahan, mahimo nato ang pagpadalagan sa *library*, gamit ang nagkalainlaing kinaadman ug kusog. Sa ubang mga dapit, anaa gayud ang pondok sa mga nagsuporta nga gihinganlan og “Friends” o “Higala” sa library, sa hospital, sa Fire Department, ubp.

Busa, nagaawhag ang *Kitang Lungsuranon* sa tanan nga gustong makakita og Siaton Public Library nga maghiusa isip mga “Higala” aron atong maplano og maayo ang atong tahas. Walay gipili basta lang gusto ka nga motabang—batan-on o tigulang, Siatanon o dili, nia sa Siaton o tua sa layo!

Gilauman nato nga si Kag. Steve Macahig sa Komitiba sa Edukasyon sa Sangguniang Bayan ug si Engr. Alma Ragay sa Kagamhanan sa Siaton mokuyog kanato kay gikinahanglan gayud nato ang ilang paggiya.

Palihug padala sa imong tubag sa montesoldwisch@gmail.com o sa Facebook sa *Kitang Lungsuranon*, o text kang Eugene sa 0905-817-2988 ug kang Rey Mark sa 0905-111-9501.

Daghang salamat! Mag-ampo usab kita nga maiwagan ang atong mga tunob sa atong Ginoong Jesu Cristo.

Pangutana: Kon aduna’y gidamgo ang tawo, unsa’y gikinahanglan aron matinuod ang damgo?

Kitang Lungsuranon

Gimantala sa **KL Publishing**, Siaton, Neg. Or., Philippines,
www.KitangSiatanon.com
TIN: 420-321-172-000; Permit number: 13-0450

Publishers

William Soldwisch & Susan Monte de Ramos-Soldwisch

Editor-in-Chief

Melita “Bing” Aguilar

Copy Editor

Mirzah Rodriguez

Tigbalita / Manunulat

Grace Arcellana
(2) 535-4718

Eugene Jamandron
0905-817-2988

Rey Mark Tubato
0905-111-9501



Gusto ka bang mahibalo kabahin sa badyet sa tuig 2014? Mga nagasto, sweldo sa mga empleyado ug galastuhan sa lungsod ug gigahin nga kwarta alang sa mga proyekto sa lungsod? Bisitaha dayon ang gawas sa Sangguniang Bayan (SB). Didto imong makita ang tanan. Ang nagpahimutang mao sila si Libeth Marie Kinkito ug Maricel Asonio, mga empleyado sa gobyerno sa Siaton.

Opisyales sa Brgy. Albiga nagpulong

Si Kapitan Jovito Y. Pajaron sa Albiga madasigon nga nangulo sa sisyon sa Sangguniang Barangay niadtong Hunyo 16, 2014 diin gihisgutan ang *Internal Revenue Allotment* (IRA), mga nagasto sa pista, mga nadawat nga hinabang ug donasyon, ug mga abot sa barangay. Matud ni Melanie Macajig, tesorera, may abut nga P60,894.30 sa pista. Gikuhaan kini sa gastos nga P50,574.60, mao nga milimpyo kini og P10,319.70.

Gihisgutan usab ang eskidyul sa pagrehistro sa mga taga Albiga didto sa Comelec,

ang pakiglambigit sa VAWC (Violence Against Women and Children), ang pagpasa sa DILG batok sa proyekto, ug pag-apil sa pagbansay alang sa kalinaw ug kahusay.

Tinguha karon ni Kapitan Pajaron nga mabalhin ang P264,000.00 nga gigahin sa miaging administrasyon alang sa pagtukod og semento nga kanal o *Construction of Concrete Drainage and Canal* sa Purok 11 ngadto sa mga gikinahanglan nga programa ug proyekto sa mga katawhan alang sa edukasyon, panginabuhì, ug panglawas.

ug mga barangay aron mapadangat kanila ang mga serbisyo.

Niadtong Hunyo 12, sa Adlaw sa Kagawasan, si Col. Lt. Miguel Ceballos nga taga Iloilo miingon nga tinguha gayod nila ang kalinaw ug kahusay sa lungsod. Dili lamang ang 79th IB ang gibansay kondili ang tanang sundalo sa tibuok nasod.

AFP, PNP dunay kasabutan pagseguro sa NegOr

Mga opisyales sa Philippine National Police ug sa Armed Forces of the Philippines, nga girepresentahan sa Philippine Army, mipirma sa *memorandum of agreement* (MOA) o kasabutan bahin sa seguridad sa 47 ka importante nga instalasyon sa Negros Oriental.

Kining kasabutan lakip sa bag-o lang pagdeklarar sa Negros Oriental isip lalawigan nga makadumala sa panagbangi ug andam sa kalamboan o “conflict manageable and development ready.” Ang pagdeklarar gihimo human gianunsyo sa AFP ug PNP nga mikunhod ang problema sa mga rebelde dinhi sa lalawigan.

Si Col. Allan Martin, pangulo sa 302nd Brigade nga nabasi sa Tanjay City, ug Senior Supt. Mariano Natuel Jr., NOPPO OIC director, mipirma sa MOA sa Negros Oriental Provincial Police Office.

Ubos niini, ang ubang instalasyon nga kanhi ilalum sa militar gibalhin na sa pulisiya.

Sa 47 ka importante nga

mga instalasyon nga “taas,” “igo-igo,” ug “ubos” ang kakuyaw, 45 niini ang ilalum sa responsabilidad ug pagdumala sa PNP, ug ang duha, ang Southern Negros Geothermal Project sa Energy Development Corporation ug ang Green Core Geothermal Inc., sa Valencia, Negros Oriental, ilalum sa Army.

Ang 45 ka importanteng instalasyon sa lalawigan maglakip sa airport sa Dumaguete City, mga pantalan, terminal sa bus, kooperatiba sa elektrisidad, mga pasilidad sa telekomunikasyon, ug punduhanan o tangke sa tubig.

Ang posibleng buhaton sa “kaaway” sa mga instalasyon mao ang pagbomba, pagsabotahe, pangilkil, ug pagsunog.

Si Martin miingon nga ang kasabutan magtudlo kon kinsa ang reponsabli sa mga instalasyon sa Negros Oriental, apan wala magpasabut nga ang Army dili na moapil sa seguridad. (PNA)

NegOr... gikan sa p. 1

bag nga adunay sulod nga panit sa iho ug “torso” kun lawas gihapon sa iho. Ang mga nadakpan mao sila si Allan Empinado, drayber sa sakyanan ug ang iyang mga kauban nga si Gerry Atillo, 24 anyos, ug Daniel Amistoso, 61 anyos. Mag-atubang sila sa kaso sa pagsupak sa ordinansa sa Cebu City.

Giangkun sa MAO nga ang dakong problema kay wala may ordinansa o balaod nga gadili sa pagdakop sa mga iho sa atong probinsya. Kini ang hinungdan sa pagpadayon sa pagpanguha niini.

Ang opisina mibutyag nga

sa umaabot nga tigum karong bulana sa mga mangingisda sa tibuok lungsod ilang isangyaw nga gidili ang pagdakop niini. Kon makadakop man galing, buhian kini samtang buhi pa.

Si Sarah Alexandra Colton, *peace corps volunteer* sa Coastal Resource Management o pagdumala sa baybayon, miingon nga kinahanglan nga panalipdan kini nga klase sa isda. Kon ilang makit-an asa gayod gipanguha kining mga isda maghimo sila og “feeding or cleaning station.” Mahimo kini nga modani sa mga *divers* ug turista ug makabenipisyo ang lungsod niini.

20th... gikan sa p. 1

of Enhancement Training” didto sa Fort Magsaysay, Nueva Ecija. Didto ilang tun-an ang paggamit sa mga bag-ong armas ug stratihya sa pakigsangka.

Ang 20th IB magpadayon sa mga programa sama sa *medical mission* sa mga barangay. Lakip na niini ang pag-ilaila sa mga katawhan



TULO KA MGA ATLETA GIPASIDUNGGAN. Malipayon ug mapagarbohon nga gipasidunggan ang tulo ka babayeng manunula og soccer nga Silver Medallist sa Palarong Pambansa didto sa Laguna. Gikan sa wala ngadto sa tuo: Kag. Edgar Ragay, Mayor Alberto Ator, Johanna Quitay, Marbelle Joy Solon, Florenz Acson, Vice-Mayor Teddy Yap, Kag, Judith Lagos, ug Kag. Steve Macahig.



Nagbasa sa KL sila si Brgy. Kagawad Estelita P. Gadiana ug ang *bookkeeper* nga si Carmelita Pajaron didto sa ilahang *barangay hall* sa Albiga. Matud pa nila, karon nahibalo na sila sa mga proyekto nga giaprobahan ug giusob o *gi-realign* sa SB. Nagdugang usab ang KL kanila og kaalam ug pag-giya sa mga katawhan sa ilang barangay.

34... gikan sa p. 1

Arado, Emelyn Verances, Wilma Jandog, Flordelyn Jandog, Dorotea Bangaysiso, Adriano Ricardo, ug Ernan Tubat taga Siit; Arlene Merlas, Bonbonon; Felicisima Mangolare, Malabuhan; Tessie Toro, Bernanditha Toro, ug Manuela Palallos taga Mantuyop; Cresencia Japon ug Helen Ege, Bonawon; ug Rowena Lumayas taga Bonbonon.

Tukuran usab og *Day*

Care Center ang Bonawon, Cabangahan, Mantuyop, Casalaan, Mantiquil, Tayak, ug Siit. Adunay gigahin nga 3.3 milyon pesos alang niini ug P744.000 nga *Capacity Building* alang sa mga magtutudlo.

Makadawat og tag P450,000 ang barangay nga tukuran sa tunghaan. Ang kwarta anaa na sa panudlanan sa lungsod ug maghulat na lamang sa *bidding* ug implementasyon nga lihokon sa *Engineering Office*.

Pulis Balita

Hubog namanto og bato

Gibantoan og bato ang suga sa atubangan sa motor ni Loreto Tayko, 18 anyos, estudyante samtang naglantaw siya og basketbol. Nahitabo kini niadtong Hunyo 20, 2014, sa alas 8:50 sa gabii didto sa Sitio Naga, Brgy. Caticugan. Ang namanto giila nga si Ekoy, 27 anyos, nga miabut nga hubog didto sa basketbolan. Taga Naga usab siya.

Gidasmagan og potpot

Gidasmagan og potpot si Alberto Quitay Gadingan, 51 anyos, taga Brgy. Mantuyop diha sa tiyangge niadtong Hu-

nyo 22, 2014 sa alas 4:40 sa hapon. Ang nakadasmag mao si Junrel Caponay Cabrera, 19 anyos, taga Brgy. 3. Nasamdan si Gadingan sa walang bahin sa iyang tiil.

Hubog Nagmaoy sa Tiyangge

Nanghasi ang usa ka hubog sa tiyangge niadtong Hunyo 22, 2014, Dominggo sa alas 3:30 sa hapon. Ang nanghasi mao si Dante Pasquil Nemaria, 38 anyos, taga sitio Lapay, Brgy. Tayak. Naabtan ni SPO4 Luciano Kinilitan ang suspetsado nga hubog kaayo, naghukas ug nasumbagan sa wala mailhing tawo.

PAHIBALO, SIATANON

Ang gikinahanglan sa pagrehistro, pagbalhin, pag-usob og "validation" para karong umalabot nga piniliay: (Magdala ug usa bisan asa niini)

- | | |
|----------------------|---------------------|
| 1. Birth Certificate | 6. PRC I.D |
| 2. Marriage Contract | 7. Passport |
| 3. SSS I.D | 8. Driver's License |
| 4. GSIS I.D | 9. IBP I.D |
| 5. Student I.D | |

Gipahibalo usab sa Comelec Siaton nga aduna silay ipahigayon nga "satellite registration" diin ang taga Comelec moadto sa inyong taga-tagsa ka barangay. Kini mao ang mga *schedule*:

Giligaon	-	Hunyo 25-27 (3 ka adlaw)
Cabangahan	-	Hulyo 1-3 (3 ka adlaw)
San Jose	-	Hulyo 6 (1 ka adlaw)
Maloh	-	Hulyo 7-9 (3 ka adlaw)
Caticugan	-	Hulyo 13 (1 ka adlaw)
Sandulot	-	Hulyo 14 & 16 (2 ka adlaw)
Tayak	-	Hulyo 21 (1 ka adlaw)
Casalaan/Candugay	-	Hulyo 28 & 30 (2ka adlaw)
Albiga	-	Agosto 11-12 (2 ka adlaw)

ERRATUM

Sa niaging isyu, dili church apan Atty. Peter Church Abejero ang iyang ngalan.



Products & Services: 24 HRS

WE ACCEPT ALL KINDS OF PRINTING JOBS • DVD & VCD BURNING
COMPUTER SALES, REPAIR (expert)•INK REFILL, CONVERT PRINTER TO CISS
PVC ID, BUSINESS CARD, CERTIFICATES • BOOK BINDING(SOFT & HARD)
RUBBERIZED T-SHIRT PRINTING • MOVIE, MUSIC & PHOTO EDITING
BASIC COMPUTER TUTORIAL (program and hardware)

PLS. CONTACT

CELL # 09351644232 TELL # (035)427-2584
09499424117

Address: BRGY 1, Siaton, Neg. Or.
(INFRONT OF SIATON PLAZA)